



Kuitukuza Sheria

ya Mungu

Ili mpate kukumbuka na kuyafanya maagizo yangu yote, na kuwa watakatifu kwa Mungu wenu.—**Hesabu 15:40.**

Maagizo yote yaliyotolewa kwa wana wa Israeli ya zamani kuhusiana na kufundisha amri za Mungu kwa watoto wao ni kwa ajili yetu. Ikiwa tutakuwa wazembe, na kupuuza kuhimiza umuhimu wa kutii amri hizi, kama ninavyojua kwamba wengi wamefanya, hebu sote na tunyenyekeze mioyo yetu mbele za Mungu, na kuifanya kazi ya toba kwa bidii na kwa ukamilifu. Hebu tujifunze kushughulika na watoto wetu kwa huruma. Katika miaka yao ya ujana wanapaswa kufundishwa kwa fadhili, kwa subira, kwa akili, kwa upendo katika huduma zote za kidini, wazazi wakifanya masomo haya kuwa sahili na yenye kuvutia, ili wawajulishe watoto wao njia ya Bwana. Kushindwa kwa wazazi kufanya kazi hii hapo awali, kumeonekana katika vizazi vilivyofuata....

Inahitajika jitihada ya kudumu, yenye ustahimilivu ili kutunza kiwango cha uadilifu kilichotukuka; lakini hakuna yeyote aliye mzembe katika kanuni anayekubaliwa na Mungu. Uzoefu wetu wa kidini unaharibiwa kwa kuruhusu kanuni zetu kupotoshwa. Sasa, zaidi ya wakati mwingine wowote wa historia ya ulimwengu, tunapaswa kutii mausia haya, “Kwa sababu hiyo ninyi nanyi jiwekeni tayari; kwa kuwa katika saa msiyodhani Mwana wa Adamu yuaja.”

Katika zama za kale maonyo yalitolewa mara kwa mara dhidi ya ibada ya sanamu. Katika zama hizi za dunia hatari hiyo hiyo ipo. Tunapaswa kuwalinda watoto wetu dhidi ya kuwa na ushirika na ulimwengu, na dhidi ya kuiga matendo ya wale walio gizani. Kwa kadiri inavyowezekana, hebu na tuwatenge mbali na jamii ya wasioamini. Tunajua kwamba wale ambao hawamtumikii Bwana Yesu wanamtumikia kiongozi mwingine, na kwamba kiongozi huyo atafanya jitihada za makusudi kudhibiti akili za wale wanaoujua ukweli.

Kazi za udanganyifu za Shetani zinaendelea kutekelezwa kila mahali. Wale wanaompenda Mungu kwelikweli wataonesha upendo wao Kwake katika kila hali na kwenye mazingira yoyote. Hawatakubali kujihusisha katika maburudisho ya kipumbavu na burudani za walimwengu. Hawatahawishiwa kumsahau Bwana wakati wowote. Wakristo wanaweza na wanapaswa kuhisi uchungu mtakatifu dhidi ya upungufu na upumbavu wa wale wasiompanda Mungu. “Jiangalie nafsi yako,” na usiingie katika majaribu kwa kusema maneno yasiyofaa, yasiyo na thamani, na yasiyo na maana. Zungumza maneno yale ambayo yanaonesha kuwa wewe u mwana wa Mungu, na kwamba moyo wako umejazwa na upendo Wake.

Bila shaka tunalazimika kuwa watu wa pekee, watakatifu kwa Bwana, kama wana wa Israeli walivyotakiwa kuwa, vinginevyo hatuwezi kumwakilisha kikamilifu Mkombozi wetu mwenye hekima, huruma na Aliyetukuka (Manuscript 152, 1901).